

МЕСЯЦА ИУЛИЯ В 1-Й ДЕНЬ

СВЯТЫХ И ЧУДОТВОРЦЕВ, БЕЗСРЕБРЕНИКОВ КОСМЫ И ДАМИАНА, В РИМЕ

МУЧИВШИХСЯ

НА ВЕЧЕРНИ

На Господи воззвах, Стихиры на 6, глас 1.

Подобен: Небесных чинов:

Чудесными зарями * болезней наших отжените всяк недуг, * безсребренно благодать простирающе, * дарованьми Учителя обогащесе, * на земли болезни земнородных * взяшаго на рамах Своих.

Врачебне, убо первее, * наказавшесе добре, * болезни всем очищаете верою, * второе же, паки духовно себе вооруживше, * отгоняете Божественне * и душевных недуг вреждения.

Яко безсребренно благодать от Христа Бога приемше, * всем безсребренно исцеляете, * безсребреницы, недуги, * не токмо наша болезни очищаете, * но и скотом дающе словесно исправление, * яко милостиви.

Ины стихиры, глас 4.

Подобен: Дал еси знамение:

Водами духовными, яко реки, наводняеми, * и, яве наполншесе, тварь напоете * Богознаемьми и преславными исцелений дарованиями, * и душетленные страсти изсушаете, * и недуги исцеляете, * и отгоняете духи, * Богоноснии безсребреницы, * молитвенницы о душах наших.

Страсти безсловесныя покорше, святии, * душевными силами, * человеком и скотом благодеяние подаваете, * от Христа дарованием исцелений обогащесе. * Темже священное ваше * и светоносное торжество совершающе, * просим очищения душам нашим.

Божественный храм ваш * яко небо показася, светозарно и спасенно, * яко звезды, чудеса спасительна ныне притяжав * и, якоже солнце светло, * исцелений Божественное действо, * Космо преблаженне, Дамиане преславне, * Господни служители, * молитвенницы о душах наших.

Слава, глас 6:

Безконечна есть святых благодать, * юже от Христа прияша, * темже и мощи их от Божественныя силы * непрестанно действуют чудеса, * ихже и имена, верою призываема, * неисцельныя болезни исцеляют; * имиже, Господи, и нас душевных и телесных страстей свободи, * яко Человеколюбец.

И ныне, Богородичен или Крестобогородичен.

Подобен: Всю отложивше:

Агнца Своего Агница нескверная древле * и Непорочная Владычица * на древе Крестнем яко узре, * матерски восклицаше и, дивящися, вопияше: * Чадо сладчайшее, * что зрение сие новое и преславное? * Како сонм безблагодатный судищу Пилатову предаде Тя * и осуждает на смерть Живота всяческих? * Но воспеваю Твое неизреченное, Слове, низхождение.

На стиховне стихиры Октоиха. Слава, глас 6:

Всегда имуща Христа, * действующа в вас, * святии безсребреницы, * чудодействуете в мире, болящия исцеляете, * ибо врачевство ваше источник есть

неисчерпаемый: * черплемый же, паче изобильно истекает, * и изливаемъ, изобилует; * на кийждо день истощеваемъ, и умножаемъ, * всем подая, и неоскудеваемъ пребывая; * и черплющие насыщаются исцеления, * той же пребывает неиздивущ. * Что убо вас наречем? * Целительных ли врачей душ же и телес? * Целителей страстей неисцельных, * туне исцеляющих всех, * приемших дарование от Спаса Христа, * подающаго нам велию милость.

И ныне, Богородичен или Крестобогородичен.

Подобен: Трдневен:

Видящи Тя распинаема, Христе, * Тебе Рождшая вопияше: * что странное еже вижу таинство, Сыне Мой? * Како на Древе умираеши, плотию повешен, * жизни Подателю?

Тропарь, глас 8:

Святии безсребреницы и чудотворцы Космо и Дамиане, * посетите немощи наша: * туне приясте, туне дадите нам.

НА УТРЕНИ

На Бог Господь: тропарь, дважды.

Слава, и ныне, Богородичен или Крестобогородичен.

Каноны оба Октоиха и святых на 6, глас 4.

Песнь 1

Ирмос: Трискраты крепкия, * Рождейся от Девы, * безстрастия во глубине * души тричастное потопи, молюся, * да Тебе, яко в тимпане, * во умерщвлении телесе * победное воспою пение.

Двоице световидная мудрых безсребреник, Троице Честней со всеми избранными предстоящи, молися, память твою светоносную творящим просветитися Духа Божественными светлостьми.

Превысоцы умом в сущих вещех явльшеся, невещественна блистания Духа, мудрии, приясте, святии. Темже тьму недугов разрешаете всегда посещения Божественными, безсребреницы.

Недреманно душевное стяжавше око ко исполнению Божию Божественных заповедей, спящия в недужех, славнии, к доброму здравию возбуждаете благодатию, милостивии Богоноснии безсребреницы.

Богородичен: Спаса и Бога от чистых Твоих кровей воплотила еси, Чистая, показавшаго нам врачю душам нашим, Пречистая, спасительны и теплы заступники, честныя безсребреники, Духом.

Песнь 3

Ирмос: Не мудростию, и силою, и богатством хвалимся, * но Тобою, Отчею Ипостасною Мудростию, Христе, * несть бо свят, паче Тебе, Человеколюбче.

Миро благовонно исцелений Божественный храм ваш источает священно, тучи духовныя, страсти злосмраднаыя отмывая всегда.

В Небесных селех водворяющеся всегда, сень вашу присно источник исцелений, премудрии, показываете благодатию Вседержителя.

Плотския страсти воздержания бродою обуздавше, духовныя зари пребогато приясте, темже исцеленными мир обогащаете.

Богородичен: Краснейшу в женах Тя Бог избра и из Тебе плотски, Чистая, родитися благоизволи, почивай во святых Своих.

Седален, глас 8.

Подобен: Премудрости:

Исцелений датели, и чудотворцы, * и чудес светильники светоприемнии всем явистесе духовною благодатию, * страстный бо пламень верою прохлаждаете * и верным в ней смысл согреваете. * Тем врачество душевное стяжавше, Божественную церковь вашу, * к нейже прибегающе, вопием: * Богоносцы безсребреницы, молитве Христа Бога согрешений оставление даровати * празднующим любовию святую память вашу.

Слава, глас и подобен тойже:

Исцелений зари сущим на земли возсияюще, Божественнии чудотворцы, * яве отгоняете человек недуги, * воистинну незаходимаго Солнца в себе стяжавше, Христа Бога нашего. * Темже, достойно сопедшеса, * почитаем славную, святую, и честную вашу память, Богоноснии безсребреницы. * Молите Христа Бога грехов оставление подати * чтущим любовию святую память вашу.

И ныне, Богородичен:

Яко Деву и едину в женах, Тя, без семени рождшую Бога плотию, * вси ублажаем, роди человечестии: * Огонь бо вселися в Тя Божества, * и, яко Младенца, млеко питаеши Зиждителя и Господа. * Тем, Ангельский и человеческий род, достойно славим пресвятое рождество Твое * и согласно вопием Ти: * моли Христа Бога согрешений оставление даровати * покланяющимся верою пресвятому рождеству Твоему.

Крестобогородичен:

Агнца, и Пастыря, и Избавителя Агнца зрящи на Кресте, * восклицаше, плачущи, и, горько рыдающе, вопияше: * мир убо радуется, приемля Тобою избавление, * утроба же Моя горит, зрящи Твое распятие, еже терпиши за милосердие милости. * Долготерпеливе Господи, милости бездно и источниче неисчерпаемый, * умилосердися и даруй согрешений оставление * верою поющим Божественныя страсти Твоя.

Песнь 4

Ирмос: Седяй в Славе на Престоле Божества * во облаце легце, * прииде Иисус Пребожественный * Нетленною Дланию и спасе зовущия: * слава, Христе, силе Твоей.

Живоносными действиями, всяческими деяниями, смертоносныя страсти человек исцеляете, световиднии столпы, забрала недвижима, винограда истиннаго Божественныя лозы.

Сосцы церковнии, иже млеко проливающе исцелений, просвещений, безсребреницы, питающе всех Божественными брашны, да восхвалятся радостными песньми.

Врачество показася храм ваш, святии, обуреваемым небурно пристанище и спасительно, воньже притекающе, вси приемлем тишину и лютых избавление.

Богородичен: Милости мя, Дево, яже в Тебе, сподоби, рождающая Слово, едина воистинну Милостивное, едино милостивны святыя показавшее, целители и чудотворцы в концех.

Песнь 5

Ирмос: Ужасошася всяческая * о Божественней славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Божественными светлостями яже облистаеми, весь обходите мир, вся человеки просвещаете, тьму отъемлюще страстей, демоны прогоняюще, Богоноснии безсребреницы.

Яко два просвещаете светильника поднебесную, духодвижно, Богоносцы, всю тварь обходяще, и иже на одре болезней посещающе, и от бед изымающе.

Недугующим исцеление, страстей избавление подающе безсребренно, всем предстатели велицы явистеся, всем помощницы с Богом, всем заступницы, Богоноснии безсребреницы.

Богородичен: Мудрость породила еси Божию Ипостасную, Пречистая Дево Богородице, святыя премудры показавшую, имиже зломудреца падеся шатание и лютая ухищрения.

Песнь 6

Ирмос: Пожру Ти со гласом хваления, Господи, * Церковь вопиет Ти, * от бесовския крове очищися * ради милости от ребр Твоих * истекшею Кровию.

Не хитростию человеческою, но Божественною благодатию очищаете недуги человеков, славнии, сего ради сошедшеся, по долгу вас ублажаем.

Любовию ко Христу, Богоноснии, связаемы, всю злобу демонов разрушаете Божественною благодатию, сего ради ваше совершаем торжество.

Яко суще винограда Божественнаго прозябения, вино нам исцелений, сущим в сетовании недугот, точаще, веселия исполняете, безсребреницы.

Богородичен: Храм Тя чист содела, Владычице, Пречистое Слово, Еже Божественный храм безсребреник величая в чудесех и знамениих всегда.

Кондак, глас 2:

Благодать приимше исцелений, * простираете здравие сущим в нуждах, врачеве, * чудотворцы преславнии, * но вашим посещением ратников дерзости низложите, * мир исцеляюще чудесы.

Икос: Всякаго разума и мудрости преходит слово мудрых врачей, и всем разум подают: Вышняго бо благодать приимше, невидимо здравие даруют всем. Отонудуже и мне повести благодать даровася пети, яко Богоносныя угодники Христовы и служители, исцелений множество подающия, болезни бо всех избавляют, мир исцеляюще чудесы.

Песнь 7

Ирмос: В печи авраамстии отроцы персидстей, * любовию благочестия паче, * нежели пламенем, опаляеми, взываху: * благословен еси в храме славы Твоя, Господи.

Отверзающе источник Богоданный, святии, всем реки источаете чистых исцелений, отмывающе страстей сквернения и демонов злобу всегубительную.

Укрепляема Вседержителя Духа благодатию, здравие болящим всегда подает двоица безсребреник Твоих досточудная, Слове Божий, Мудросте и Сило.

Свят един еси, прославляя святыя Твоя, мир бо тех ради избавляеши от бед и просвещаеши зовущия: благословен еси в храме славы Твоея, Господи.

Богородичен: Жезл из корене Иессеева Ты прозябла еси, цвета Христа израстивши, Марие, яко цветцы, чудесы украсившаго Своя безсребреники угодныя.

Песнь 8

Ирмос: Руце распростер, Даниил * львов зияния в рове затче; * огненную же силу угасиша, * добродетелию препоясавшися, * благочестия рачители, отроцы, зывающе: * благословите, вся дела Господня, Господа.

Нази всякия явистесе вражия злобы, святии, Божественным Духом, нам бывше одежда спасения, и оставления вина, и лютых пременение, вопиющим: вся дела, благословите, Господня, Господа.

Сынове по причастию Божии, Дамиане и Космо, бывше, верою отеческий жребий ныне обретосте, Небесное наслаждение и чудес светлое воистинну действо, и вопиете: вся дела, благословите, Господня, Господа.

Кропленьми вашими боголепными скверну омойте душевную нашу, и болезненныя, святии, прожените страсти, и демонская стремления отымите, яко предстателие и яко целителие наши милостивии.

Яко крин, яко цвет мысленный, яко шишцы, Духом украшени, нам явистесе, святии, благовоние воспускающе и злосмрадие страстей отгоняюще, вопиющим: вся дела, благословите, Господня, Господа.

Богородичен: Умерщвляется смерть Тобою, Жизнь бо родила еси Ипостасную, Христа Бога, Пречистая, и предстатели жизни наша показавшаго, безсребреники врачии, вопиющим: благословен, Пречистая, Плод Твоего чрева.

Песнь 9

Ирмос: Ева убо недугом преслушания * клятву вселила ест; * Ты же, Дево Богородице, * прозябением чревоношения мирови благословение процвела еси. * Тем Тя вси величаем.

Се ныне что добро, или что красно, якоже пишет, но токмо, еже жити ныне братии в единомышлении, в месте светозарне, в селех Небесных, во славе неувядающей, яже по достоянию ублажаем.

Яко велик сий храм, чудесы всегда украшаемь, воньже присно приходяще, Космо и Дамиане досточуднии, здравие требующим подаваете, темже достойно блажими есте.

Данесь срадуются нам, блаженнии, в памяти вашей, Ангели и Божественнии апостоли, пророцы и преподобнии и вси праведницы, с нимиже радостно водворяющесе, за весь мир молитесе.

Божественная двоице и светозарная, безсребреннии, и Богоноснии, и всечестнии, оставление согрешений, и исправление жития испросите, и всех лютых избавление восхваляющим вас всегда.

Богородичен: Света жилище, Чистая, была еси, вся озарившаго и светоносны и святы показавшаго, ныне тьму отъемлюща страстей душетленных Духом, Пречистая едина Приснодево.

Светилен.

Подобен: Небо звездами:

Кое довольно будет слово безсребреник изрещи благодать исцелений? * Ибо суть по Бозе всей вселенной врачеве и спасителие.

Богородичен:

Державным Твоим кровом от враг навета нас, Чистая, Твоя рабы, сохрани вся невредны, * Тя бо стяжахом едину прибежище в скорбех.

На хвалитех стихиры на 6, глас 1, самогласны:

Благодать исцелений от Бога приемше, * безсребренно страсти душ и телес наших тепле исцеляете, * всекраснии безсребреницы, * темже вами Христос верным данное здравие даруя, * светила нелестная вас показывает вселенней. * Того умолите, спастися душам нашим.

От вышняго промысла бездну исцелений почерпше, * всем источаете верным исцеления, безсребреницы, * преестественне бо недугующих страсти * рукодействию таинственными, * от сокровищ Духа лечбы предлагающе спасительныя, * страждущих исцеляете. * Темже храм честен бысте Живоначальныя Троицы, * в вас бо яве обитель сотвори, * Ейже молитесь * спастися душам нашим.

Глас 2. Феофаново:

Любовию Божественною и желанием будущих, * детельне поживше, * спасительныя пути исправисте. * Темже, чистоту душевную нескверно соблюдше, * вещным до конца противу стаете, * Духом же Божественным позлащешся, * беззлатно исцеление недугующим подаете, * двоице священная, * светозарное собрание, * просвещенный Божественный содруже, безсребреницы, * в скорбех и болезнях посещающе нас * и душ наших недуги безмездно исцеляюще.

Германово: Великим сподобльшися даром, прехвальнии, * в смиренном житии на земли пожисте * и, проходяще всюду, туне болящих страсти исцеляюще, * явистесь Ангелом собеседницы, * Космо с Дамианом мудрым, * братия прекраснии, * и наша страсти молитвами вашими исцелите.

Стих: Святым, иже суть на земли Его, * удиви Господь вся хотения Своя в них.

Источник исцелений единаго токмо в лете исцелеваше, * храм же безсребреников все множество исцеляет недугующих: * неоскудно бо есть и неизживаемое богатство святых. * Тех молитвами, Христе, помилуй нас.

Стих: Се что добро, или что красно, * но еже жити братии вкупе.

Германово: Радуется лик святых во веки, * Царство бо Небесное наследоваша; * земля, мощи их приемши, благовоние распусти, * раби Христовы быша, * всельшися в жизнь вечную.

Слава, глас 4. Феофаново:

Источник исцелений имуще, святии безсребреницы, * исцеление подаете всем требующим, * яко великим даром сподобльшися от приснотекущаго источника —

Спаса Христа. * Рече бо к вам Господь, яко единоревнителем апостолов: * се дах вам власть над души нечистыми, * якоже тех изгонити * и исцелити всяк недуг и всякую язю. * Темже, в повелениях Его добре поживше, * туне приясте, туне подаете, * исцеляюще страсти душ и телес наших.

И ныне, Богородичен.

Аще ли случится среда или пяток, глаголи Крестобогородичен, глас 4.

Подобен: Яко добля:

Распинаема Христа Человеколюбца видящи Пречистая * и ребра ископаваема копием, * плачущи, вопияше: * что сие, Сыне Мой? * Что Ти безблагодатнии людие воздаша, * за яже сотворил еси добрая им, * и тщишия безчадствовати Мя, Вселюбезнейший? * Удивляюся, Благоутробне, Твоему вольному распятию.

На стиховне Октоиха.

Слава, глас 8:

Кто не удивится, * кто не прославит, * кто не воспоеет верно * мудрых и преславных безсребреник чудеса? * Яко да и по святом их преставлении * всем подают, притекающим верою, богато исцеления, * и честныя и святыя мощи тех источают благодать исцелений. * О двоице святая! * О честныя главы! * О премудросте и славо, * яже от Бога данныя вам благодати! * Темже песньми зовем Благодетелю Богу, * показавшему тех на врачевание душ и телес наших.

И ныне, Богородичен или Крестобогородичен.

Подобен: О, преславнаго чудесе:

Юница Нескверная, * Юнца видящи, на Древе * пригвождаема волею, * рыдающи жалостне: * увы Мне,— вопияше,— * любимейшее Чадо, * что Ти сонм воздаде безблагодатный еврейский, * хотя Мя обезчадствовати * от Тебе, Вселюбезне?

НА ЛИТУРГИИ

Блаженны Октоиха, на 4, и от канона святых, песнь 3-я, на 4.

Миро благовоново исцелений Божественный храм ваш источает священно, тучи духовныя, страсти злосмрадна отмывая всегда.

В Небесных селех водворяющесе всегда, сень вашу присно источник исцелений, премудрии, покажете благодатию Вседержителя.

Слава: Плотския страсти воздержания бродою обуздавше, духовныя зари пребогато приясте, темже исцеленьми мир обогащаете.

И ныне: Богородичен: Краснейшу в женах Тя Бог избра и из Тебе плотски, Чистая, родитися благоизволи, почивай во святых Своих.

Тропарь святых, глас 8:

Святии безсребреницы и чудотворцы Космо и Дамиане, * посетите немощи наша: * туне приясте, туне дадите нам.

Кондак святых, глас 2:

Благодать приимше исцелений, * простираете здравие сущим в нуждах, врачеве, * чудотворцы преславнии, * но вашим посещением ратников дерзости низложите, * мир исцеляюще чудеса.

Прокимен, глас 4: Святым, иже суть на земли Его, * удиви Господь вся хотения Своя в них.

Стих: Предзрех Господа предо мною выну, яко одесную мене есть, да не подвижуся.

Апостол к Коринфяном, зачало 153.

Братие, вы есте тело Христово и уди от части. И овы убо положи Бог в Церкви, первее апостолы, второе пророки, третие учителя; потом же силы, таже дарования исцелений, заступления, правления, роди языков. Еда вси апостоли? Еда вси пророцы? Еда вси учителя? Еда вси силы? Еда вси дарования имут исцелений? Еда вси языки глаголют? Еда вси сказуют? Ревнуйте же дарований больших; и еще по превосхождению путь вам показую. Аще языки человеческими глаголю и ангельскими, любве же не имам, бых яко медь звенящи, или кимвал звяцай. И аще имам пророчество и вем тайны вся, и весь разум, и аще имам всю веру, яко и горы престаляти, любве же не имам, ничтоже есмь. И аще раздам вся имения моя, и аще предам тело мое, во еже сожещи е, любве же не имам, ни кая польза ми есть. Любы долготерпит, милосердствует, любы не завидит, любы не превозносится, не гордится, ни безчинствует, не ищет своя си, не раздражается, не мыслит зла, не радуется о неправде, радуется же о истине; вся любит, всему веру емлет, вся уповае, вся терпит. Любы николиже отпадает.

Аллилуйя, глас 4: Се что добро, или что красно, но еже жити братии вкупе.

Евангелие от Матфея, зачало 34, от полу.

Во время оно, призвав Иисус обанадесять ученики Своя, даде им власть на дусех нечистых, яко да изгонят их, и целити всяк недуг и всяку болезнь. Сия обанадесять посла Иисус, заповеда им, глаголя: на путь язык не идите и во град Самарянский не внидите. Идите же паче ко овцам погибшим дому Израилева. Ходяще же проповедуйте, глаголюще, яко приближися Царствие Небесное. Болящия изцеляйте, прокаженные очищайте, мертвыя воскрешайте, бесы изгоняйте, туне приясте, туне дадите.

Причasten: Радуйтеся, праведнии, о Господе:

\

Молитва

К вам, святии безсребреницы и чудотворцы Космо и Дамиане, яко к скорым помощником и теплым молитвенником о спасении нашем, мы, недостойнии, преклоньше колена, прибегаем и, припадающе, усердно вошем: не презрите моления нас, грешных, немощных, во многия беззакония впадших и по вся дни и часы согрешающих. Умолите Господа, да пробавит нам, недостойным рабом Своим, великия и богатыя Своя милости; избавите нас от всякия скорби и болезни, вы бо прияли есте от Господа и Спаса нашего Иисуса Христа неоскудную благодать исцелений, ради твердыя веры, безмезднаго врачевания и мученическаго кончины вашей. Услышите нас, молящихся, и благоприятным ходатайством вашим испросите у Христа Бога православным людям на враги победу и одоление. Паки, припадающе, прилежно молим: испросите нам от Господа вся благополезная, яже в животе нашем временем, наипаче же ко спасению вечному служащая, да сподобимся молитвами вашими улучити кончину христианскую, безболезненну, непостыдну, мирну, и да избавимся от козней диавольских и вечныя муки, безконечнаго же и блаженнаго Царствия Небеснаго наследницы будем. Ей, угодницы Божии, не престайте молящеся за ны, с верою к вам притекающия. Аще бо по множеству грехов наших и несмы достойни милосердия вашего, обаче вы, вернии подражателие человеколюбия Божия суще, сотворите, да принесем плоды достойны покаяния и в вечный покой достигнем, хваляще и благословяще дивнаго во святых Своих Господа и Бога и Спаса нашего Иисуса Христа, и Пречистую Матерь Его, и ваше теплое заступление, всегда, ныне, и присно, и во веки веков. Аминь.